

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj: 01-02-7457/25
Sarajevo, 29.04.2025. godine

OPĆINA NOVI GRAD SARAJEVO OPĆINSKI NAČELNIK

PREDMET: Vijećnička pitanja i inicijative, dostavlja se

Na 6. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

- a) Vijećničke inicijative

-Vijećnica Elma Lindov -

1.INICIJATIVA ZA IZRADU PROJEKTNE DOKUMENTACIJE ZA VODOVODNU I KANALIZACIONU MREŽU NA PODRUČJU ŠVRAKINOG SELA

U ime građana Švrakinog Sela, a na osnovu iskazane potrebe stanovnika i preporuka Savjeta mjesne zajednice, podnosim inicijativu za izradu projektne dokumentacije za izgradnju i rekonstrukciju vodovodne, fekalne i separatne kanalizacione mreže na širem području naselja, s posebnim fokusom na sljedeće ulice i kućne brojeve:-

-Vodovodna mreža:

Ulica Kodžina od broja 95. do 139., uključujući pristup prema broju 127.

Također, od broja 86. do 181.

-Kanalizacija i separatna kanalizacija:

Ulica Kodžina od broja 63. do 139.

Ova infrastruktura predstavlja jedan od ključnih prioriteta za svakodnevni život građana ovog dijela Švrakinog Sela. Problem vodosnabdijevanja i odvodnje fekalnih voda traje već dugi niz godina, uzrokujući brojne poteškoće u domaćinstvima, povećan rizik po zdravlje stanovništva te negativan utjecaj na okoliš.

Uzimajući u obzir da je navedena problematika prioritetno uvrštena u plan rada Savjeta mjesne zajednice, ovim putem molim nadležnu općinsku službu da u što kraćem roku:

1.Pokrene aktivnosti za izradu kompletne projektne dokumentacije.

2.Osigura potrebna finansijska sredstva ili inicira planiranje sredstava u budžetu.

3.Koordinira s relevantnim institucijama (Vodovod i kanalizacija d.o.o. Sarajevo, Zavod za planiranje razvoja, itd.) kako bi se ubrzao proces realizacije.

Rješavanje ovog pitanja imat će ogroman pozitivan utjecaj na kvalitetu života u ovom dijelu općine, ali i na dugoročnu održivost komunalne infrastrukture.

S obzirom na važnost i hitnost, nadam se brzom djelovanju i podršci Općine u rješavanju ovog gorućeg problema.

2. INICIJATIVA ZA IZGRADNJU SPOMEN SOBE POSVEĆENE 101. MOTORIZOVANOJ BRIGADI ARMIIJE REPUBLIKE BOSNE I HERCEGOVINE NA MOJMILU

Ovim putem podnosim inicijativu za izgradnju spomen sobe posvećene 101. motorizovanoj brigadi Armije Republike Bosne i Hercegovine, na prostoru Mojmila, u blizini EKO kuće ili vidikovca, kao dostojanstvenog i trajnog podsjetnika na period agresije na našu domovinu i na hrabrost onih koji su branili ovaj prostor srcem, životom i bezrezervnom ljubavlju prema Bosni i Hercegovini. Spomen soba bi bila više od mjesta sjećanja – bila bi prostor edukacije, zahvalnosti i ponosa. Mjesto gdje će buduće generacije moći naučiti istinu o odbrani Bosne i Hercegovine, gdje će se čuvati historija jedne brigade koja je ostavila neizbrisiv trag u odbrani Sarajeva, i gdje će se imena naših heroja izgovarati s poštovanjem i ponosom.

Ova soba bi nosila i simboličku poruku: da ne zaboravljamo. Da ne zaboravimo sinove ove zemlje koji su bez pitanja stajali na prvoj liniji, da ne zaboravimo vrijednosti koje su nas sačuvale – zajedništvo, hrabrost i vjera u budućnost.

Predlažem da se u saradnji s udruženjima boraca, historičarima i porodicama šehida, definiše koncept ove spomen sobe, koja bi uključivala fotografije, dokumente, uniforme, oružje iz perioda odbrane, video svjedočanstva preživjelih saboraca i edukativni sadržaj za mlade. Prostorna lokacija uz EKO kuću ili vidikovac na Mojmilu nosila bi dodatnu simboliku – mjesto koje gleda prema dolini Sarajeva, koje pamti, ali i gleda naprijed.

Ovom inicijativom predlažem da nadležna općinska služba pokrene sve potrebne korake za njenu realizaciju.

3. INICIJATIVA ZA ČIŠĆENJE DIVLJE ŠUME I UKLANJANJE DEPONIJE SMEĆA U ULICI MEHMEDA ALAGIĆA (NOVA OTOKA), UZ SPORTSKO IGRALIŠTE

Ovim putem podnosim inicijativu za hitno čišćenje i sanaciju divlje šume i deponije otpada koja se nalazi u ulici Mehmeda Alagića, u naselju Nova Otoka, neposredno uz sportsko igralište. Nažalost, prostor koji je nekada bio predviđen za zelene površine i uređene prostore za rekreaciju i odmor građana, danas je pretvoren u pravo ruglo u srcu naselja.

Na toj napuštenoj parceli, umjesto drveća, staza i klupa, danas imamo zaraslu šumu i divlju deponiju – neuređen, zapušten i krajnje nehigijenski prostor. Hrpe otpada, stari namještaj, plastika, građevinski otpad i svakodnevno odbačene kese i smeće, postali su dio svakodnevice ovog dijela naselja. Pored estetskog problema, ovo smetlište predstavlja direktnu prijetnju zdravlju građana, posebno djece koja svakodnevno koriste obližnje igralište.

Prisustvo štakora, zmija i drugih štetočina, kao i neprijatni mirisi u toplijim mjesecima, alarmantni su pokazatelji da se mora odmah reagovati.

Zato apelujem na nadležnu službu Općine Novi Grad Sarajevo da:

1. Organizuje hitnu akciju čišćenja i uklanjanja otpada na navedenoj lokaciji.
2. U saradnji s KJKP Rad i drugim komunalnim subjektima, očisti i sanira teren, te ukloni divlje rastinje.
3. Razmotri mogućnost uređenja ovog prostora u skladu s prvobitnom namjenom – kao zelenu površinu za rekreaciju građana, ili barem privremeno rješenje koje će spriječiti dalje odlaganje otpada.

Ova inicijativa dolazi kao odraz potrebe građana i sve češćih pritužbi stanovnika Nove Otoke koji s pravom traže da njihova okolina bude čista, sigurna i uređena – onakva kakva i priliči urbanom naselju. U nadi da će se nadležni odazvati ovom pozivu i poduzeti konkretne korake.

4. INICIJATIVA ZA HITNU SANACIJU SAOBRAĆAJNE INFRASTRUKTURE U ULICI MEHMEDA ALAGIĆA (NOVA OTOKA)

– kolaps saobraćajne mreže i ugrožena bezbjednost građana

Ovim putem podnosim inicijativu za hitnu sanaciju saobraćajne infrastrukture u ulici Mehmeda Alagića, naselje Nova Otoka, gdje je stanje puteva doseglo kritičan nivo i direktno ugrožava bezbjednost svih učesnika u saobraćaju.

Vožnja kroz ovaj dio naselja postala je prava svakodnevna avantura – zbog velikih i dubokih rupa na asfaltu, ulegnuća i površina koje su izgubile svaki oblik ravnoteže. Posebno zabrinjava dio puta koji je

potonuo i do 10 cm u odnosu na suprotnu stranu kolovoza, što dodatno povećava rizik od nesreća, naročito u uslovima smanjene vidljivosti i lošeg vremena.

Vozači su primorani da naglo koče, obilaze rupe ili prelaze na suprotnu traku, rizikujući sudare i oštećenje vozila. Pješaci, a naročito starije osobe i djeca, svakodnevno su izloženi opasnosti – prisiljeni da zaobilaze udubljenja i hodaju po kolovozu, čime se povećava mogućnost povreda.

Ovim putem pozivam nadležnu općinsku službu da:

- Izvrši hitni tehnički pregled stanja kolovoza u ulici Mehmeda Alagića.
- U najkraćem mogućem roku organizuje sanaciju udarnih rupa, izravnavanje ulegnutih dijelova i presvlačenje najkritičnijih dionica.
- Razmotri potrebu za kompletnom rekonstrukcijom ulice u planu kapitalnih investicija za naredni period, ukoliko postoje strukturni problemi koji uzrokuju ovakva oštećenja.

Održavanje i sigurnost saobraćajnica nije samo komunalno pitanje – to je pitanje javne bezbjednosti, funkcionalnosti naselja i dostojanstva života građana. Stanovnici Nove Otoke zaslužuju sigurne puteve, bez rupa i opasnosti.

5. INICIJATIVA ZA POSTAVLJANJE RASVJETNIH TIJELA NA PARKING PROSTORU U ULICI ADEMA BUĆE (KOD AMBULANTE)

Ovim putem podnosim inicijativu za postavljanje javne rasvjete na parking prostoru u ulici Adema Buće, koji se nalazi neposredno uz porodičnu ambulantu, te je s preostale dvije strane okružen stambenim objektima.

Iako ovaj parking prostor broji oko 20 parking mjesta i svakodnevno ga koriste kako pacijenti ambulate, tako i stanari okolnih zgrada, on je u potpunom mraku tokom večernjih i noćnih sati. Ovakva situacija ne samo da predstavlja sigurnosni rizik za vozače i pješake, već otvara prostor za brojne nepoželjne i potencijalno opasne situacije.

U blizoj i daljoj prošlosti, na ovom lokalitetu su se dešavala i manja razbojništva, krađe, te čak i otuđenja vozila. Mračni i nedovoljno osvijetljeni prostori često postaju mete za vandale, lopove i druge osobe sklone narušavanju javnog reda i mira.

Zbog svega navedenog, smatram da je postavljanje adekvatne rasvjete hitna mjera, koja će:

- 1.Povećati vidljivost i sigurnost za sve korisnike ovog prostora – vozače, pješake, starije osobe i djecu.
- 2.Smanjiti rizik od saobraćajnih nezgoda i eventualnih povreda.
- 3.Prevenicijski djelovati protiv krađa i vandalizma, jer je poznato da dobro osvijetljeni prostori odvraćaju počiniocima krivičnih djela.
- 4.Doprinositi općem osjećaju sigurnosti i kvalitetu života u ovom dijelu naselja.

Stoga predlažem da nadležna općinska služba:

- Izvrši teren-sko uviđanje i utvrdi tehničke uslove za postavljanje rasvjetnih tijela.
- U saradnji s KJKP "Park" ili drugim izvođačima komunalnih radova, pokrene postupak postavljanja rasvjete.
- Uvrsti ovaj projekt u prioritetne infrastrukturne zadatke za naredni period, s mogućnošću ubrzanog izvođenja radova.

Jednostavna i efikasna mjera poput rasvjete može donijeti veliku razliku u sigurnosti i kvaliteti života građana, stoga se nadam da će ova inicijativa naići na brzo i pozitivno razmatranje.

6. INICIJATIVA ZA REKONSTRUKCIJU ILI PONOVNOM IZGRADNJU MINI DJEČIJEG IGRALIŠTA U ULICI ADEMA BUĆE 22

Ovim putem podnosim inicijativu za rekonstrukciju ili ponovnu izgradnju mini dječijeg igrališta u ulici Adema Buće 22, koje je trenutno u izuzetno lošem stanju i potpuno van funkcije.

Nekada zamišljen kao prostor okupljanja djece i roditelja, ovaj kutak danas je betonska ploha bez sadržaja, ogoljen, zapušten i lišen bilo kakvih elemenata koji bi omogućili sigurnu i korisnu igru. Iako se radi o igralištu malih dimenzija, njegov značaj za širu zajednicu, a posebno za roditelje s malom djecom je ogroman.

U vremenu kada su djeca sve više izložena ekranima, a fizička aktivnost svedena na minimum, kvalitetan prostor na otvorenom je neophodan za njihov zdrav psihofizički razvoj. Ovakvi prostori ne samo da omogućavaju djeci da se igraju, kreću i druže, već i jačaju osjećaj zajedništva među stanovnicima naselja. Sanacija ovog igrališta ne zahtijeva velika finansijska sredstva niti kompleksne infrastrukturne intervencije. Uz osnovne građevinske radove, čišćenje, postavljanje nekoliko elemenata dječije opreme i pokoji sadržaj za sjedenje, ovaj prostor bi se mogao vrlo brzo revitalizirati i staviti u funkciju.

Ovim putem pozivam nadležnu službu Općine Novi Grad Sarajevo da:

1. Izvrši teren-sko uviđanje stanja igrališta u ulici Adema Buće 22.
2. Uvrsti ovaj prostor u plan manjih komunalnih i infrastrukturnih zahvata.
3. Pokrene proces izrade jednostavnog projekta obnove i rekonstruiše ovo mini dječije igralište u najkraćem mogućem roku.

7. INICIJATIVA ZA SANACIJU DEVASTIRANOG SPORTSKOG IGRALIŠTA U ULICI MEHMEDA ALAGIĆA (NOVA OTOKA)

– od rekreativne zone do opasne ruševine

Podnosim inicijativu za hitnu sanaciju sportskog igrališta u ulici Mehmeda Alagića, naselje Nova Otoka, koje je nekada bilo mjesto okupljanja djece i mladih, a danas, nažalost, izgleda kao scena iz postapokaliptičnog filma.

Igralište, koje je godinama služilo kao prostor za sport, druženje i razvoj zdravih navika, sada je u potpunosti devastirano. Asfaltna podloga je prekrivena dubokim pukotinama, a kompletan prostor je postao opasnost za sve koji ga pokušaju koristiti. Umjesto da bude mjesto sigurnosti, igre i pozitivnog odrastanja, ono je danas izvor rizika.

Umjesto da mladima damo razlog da ostanu u svom naselju, da se bave sportom i kvalitetno provode vrijeme, ovakvim stanjem ih neizravno tjeramo – s ulica na zapušten teren prepun opasnosti.

Zato ovom inicijativom tražim da Općina Novi Grad Sarajevo:

1. Hitno izvrši pregled stanja igrališta od strane nadležnih službi (služba za komunalne poslove i služba za sport i obrazovanje).
2. Pokrene sanaciju podloge, zamjenu oštećenih dijelova, obnovu sportskih elemenata (golovi, koševi, ograde) te uređenje cijelog prostora.
3. Razmotri mogućnost postavljanja reflektora i klupa, kako bi igralište bilo funkcionalno i u večernjim satima.

Ovo nije samo pitanje infrastrukture, ovo je pitanje odnosa prema mladima, prema zdravlju i budućnosti naše zajednice. Djeca i omladina zaslužuju sigurno i dostojno mjesto za igru i odrastanje, a mi, kao zajednica, dužni smo im to osigurati.

U nadi da će se ova inicijativa razmotriti prioritetno i odgovorno.

8. INICIJATIVA ZA USPOSTAVLJANJE POBRATIMSKJE SARADNJE IZMEĐU OPĆINE NOVI GRAD SARAJEVO I GRADA JERIHONA U PALESTINI

Poštovani,

Ovim putem vođena osjećajem duboke ljudske solidarnosti, historijske odgovornosti i iskrene želje za povezivanjem sa narodima koji dijele slične sudbine, ovom inicijativom predlažem uspostavljanje bratske saradnje između naše Općine i grada Jerihona, najstarijeg kontinuirano naseljenog grada na svijetu, smještenog na Zapadnoj obali Palestine.

Grad Jerihon, kao administrativno sjedište pokrajine kojom upravljaju Palestinske nacionalne vlasti, predstavlja istinski simbol izdržljivosti i neuništivog duha čovječanstva. Njegova historija, koja seže hiljadama godina unazad, nije samo lokalna ili regionalna – ona pripada čitavom čovječanstvu. Jerihon je, u svakom smislu te riječi, živi spomenik kulture, duhovnosti i borbe za opstanak.

U trenutku kada svjedočimo nezamislivim stradanjima naroda Palestine, a naročito u Pojasu Gaze, osjećam moralnu i ljudsku obavezu da učinimo više od pukog izražavanja saosjećanja. Grad Jerihon, koji danas opstaje kao jedno od rijetkih mjesta mira na Zapadnoj obali, zaslužuje podršku, pažnju i konkretne izraze prijateljstva od nas, od naroda koji je također iskusio ratne strahote, okupaciju i borbu za pravo na slobodan život.

Bosna i Hercegovina, a posebno Sarajevo, sjećaju se vremena kada je solidarnost svijeta značila nadu u najmračnijim trenucima. Danas, kada se Palestina bori za svoje dostojanstvo i opstanak, želimo poslati poruku nade i podrške, ne riječima, već djelima. Uspostavom bratske saradnje s gradom Jerihonom želimo pokazati da nisu sami, da njihova borba ima odjek u srcu Evrope, u zemlji koja ih razumije.

-Stoga, podnosim ovu inicijativu za uspostavljanje formalne saradnje i potpisivanje Sporazuma o bratimljenju između Općine Novi Grad Sarajevo i Grada Jerihona, s ciljem promicanja kulturne razmjene, međusobne podrške, humanitarne pomoći i zajedničkih projekata u duhu prijateljstva, mira i zajedničke budućnosti.

-Molim nadležnu službu da uputi pismo namjere Gradskoj upravi Jerihona, u kojem ćemo izraziti svoju spremnost da otpočnemo proces formalizacije ovog bratskog odnosa.

Sve dodatne informacije i dokumentaciju dostavit ću službi u narednom periodu.

U nadi da ćemo zajednički učiniti korak ka stvaranju mostova mira, prijateljstva i nade među narodima, srdačno vas pozdravljam.

-vijećnica Azra Čomor -

Vijećnička inicijativa:

1. Inicijativa za zamjenu stare i dotrajale rasvjete novom led rasvjetom u ulicama: Mustafe Muje Pašića, Hameda Buljubašića i Dr. Irfana Ljubijankića.

Obrazloženje: Pokrećem inicijativu da se na području Mjesne zajednice „Alipašin Most I“ u ulicama Mustafe Muje Pašića, Hameda Buljubašića i Dr. Irfana Ljubijankića izvrši zamjena stare i dotrajale javne rasvjete, novom i modernom led rasvjetom iz razloga što trenutna rasvjeta nema dovoljno efekta i ulice su djelimično „mračne“.

2. Inicijativa za rješavanje problema sa kanalizacijom u ulici Vitkovac broj 142.

Obrazloženje: Duži vremenski period građani ulici Vitkovac izloženi su problemima isticanja fekalija/kanalizacije na ulicu. Do isticanja kanalizacije dolazi iz privatnog posjeda iz ulice Adema Buće broj 497. Više puta podnošeni su zahtjevi prema nadležnoj Službi za investicije i komunalne poslove, od stane stanovnika iz ulice Vitkovac, međutim nije došlo do rješenja problema. Do isticanja dolazi u velikim količinama i stanovnici naselja žive u strahu da ne dođe do neželjenih posljedica i pojave zaraze, sa akcentom na najmlađe stanovnike koji svoje vrijeme provode u igri u neposrednoj blizini isticanja kanalizacije. Prema posljednjim informacijama s kojim raspoložu je da sporni objekat nije priključen na kanalizacionu mrežu i da setička jama koju koriste ne ispunjava uslove, te se od strane vlasnika ne prazni u skladu sa potrebama. Molim da se inicijativa proslijedi prema nadležnim, te da se iznađe način i riješi sporni problem.

3. Inicijativa za poduzimanje radnji na rješavanju problema sa podzemnim instalacijama u ulici Bosanskih Banova.

Obrazloženje: Pokrećem inicijativu da se kroz Projekat planira sanacija i rekonstrukcija podzemnih instalacija u ulici Bosanskih Banova. Naime ulica je u jako lošem stanju kada je u pitanju asfaltna površina a situaciju pogoršava stanje podzemnih instalacija koje je potrebno sanirati/zamjeniti. U ulici živi veliki broj osoba koje su oboljele, nepokretne, korisnici dijalize, RVI, pripadnici ARBiH, te su neki od njih primorani svaki dan da budu korisnici medicinskih usluga /dijalizni pacijenti/. Situacija je još gora u zimskom poeriodu, jer zbog situacijom sa asfaltnom površinom KJKP „Rad“ u prošloj zimskoj sezoni nije vršio zimsko održavanje. Molim vas da se iznađu sredstva i pokrene procedura za rješavanje ovog problema.

-vijećnik Jasmin Šošić -

1. INICIJATIVA za izmjene kriterija za dodjelu stipendija

Uzimajući u obzir primjedbe građana i dosadašnju praksu u raspodjeli stipendija, podnosim inicijativu kojom predlažem izmjene u sistemu dodjele stipendija, s ciljem osiguranja pravednijeg i efikasnijeg pristupa za sve učenike i studente.

Predlažem sljedeće:

1. Ukinuti cenzus primanja kao opći uslov za prijavu na konkurs za stipendiju, jer isti često isključuje porodice koje, uprkos formalno višim prihodima, imaju velike izdatke i teškoće u finansiranju obrazovanja djece.

2. Uvesti dvije jasno razdvojene kategorije stipendija:

Kategorija A – Uspjeh (prosjeck ocjena):

Ova kategorija bi vrednovala isključivo školski/akademski uspjeh kandidata, ne uzimajući u obzir primanja porodice.

Kategorija B – Socijalna osjetljivost:

Ova kategorija bi bila namijenjena učenicima i studentima iz porodica slabijeg imovinskog stanja. Predlažem da se u ovoj kategoriji cenzus primanja znatno smanji i uskladi s kriterijima za ostvarivanje prava na federalni dječiji doplatak, kako bi stipendije zaista bile dostupne onima kojima su najpotrebnije.

Također, predlažem da školski/akademski uspjeh u ovoj kategoriji ima ulogu dodatnog, ali ne i presudnog kriterija, jer je osnovni cilj pružiti podršku djeci i mladima iz socijalno ugroženih porodica bez obzira na ocjene.

Ovim prijedlogom bi se omogućilo da se stipendije dodjeljuju na osnovu jasnih i pravičnih kriterija, čime bi se istovremeno nagradio rad i trud najboljih učenika/studenata, ali i pružila podrška onima koji se nalaze u teškoj socijalnoj situaciji.

Molim da se ova inicijativa razmotri i uputi nadležnoj službi/komisiji na dalje postupanje.

2. INICIJATIVU za povećanje poreza na kladionice, kockarnice i ostale priređivače igara na sreću, te da se isti porez naplaćuje i ostaje u budžetu općine na čijem području se poslovni objekti nalaze.

Obrazloženje:

Na području Općine Novi Grad Sarajevo djeluje veći broj poslovnih subjekata koji se bave priređivanjem igara na sreću (kladionice, automat klubovi, kockarnice i dr.). Ove djelatnosti ostvaruju značajne prihode, dok istovremeno lokalna zajednica snosi dio društvenih posljedica koje iz njih proizilaze – poput povećanja socijalnih problema, zaduživanja stanovništva, porodičnih problema i sl. Međutim, aktuelni poreski sistem ne prepoznaje u dovoljnoj mjeri potrebu da jedinice lokalne samouprave, na čijem području se ove djelatnosti odvijaju, imaju direktnu finansijsku korist u vidu poreza ili naknada koje bi mogle biti usmjerene ka preventivnim i socijalnim programima, podršci mladima i drugim korisnim projektima.

Stoga smatram opravdanim da se pokrene inicijativa prema višim nivoima vlasti (Kantonu Sarajevo i Federaciji BiH), sa ciljem:

1. Da se razmotri mogućnost izmjene zakonskih propisa kojima bi se omogućilo uvođenje lokalne naknade/poreza za priređivanje igara na sreću.

2. Da se razmotri mogućnost povećanja postojećih poreza za ovu vrstu djelatnosti, uz jasno definisanu raspodjelu u korist lokalnih zajednica.

3. Da prihod ostvaren po osnovu poreza/naknada od igara na sreću ostaje u budžetu općine na čijem području se poslovni objekti nalaze.

Zaključak:

Predlažem da Općinsko vijeće Općine Novi Grad Sarajevo usvoji ovu inicijativu i da se ona dostavi:

Vladi Kantona Sarajevo

Ministarstvu finansija Kantona Sarajevo

Parlamentu FBiH – u dijelu nadležnosti za poreznu politiku

3. Inicijativa za uređenje autobuske stanice u ulici Kralja Stjepana Tomaševića kod broja 1
Tražim da nadležna općinska služba, u saradnji s Ministarstvom saobraćaja Kantona Sarajevo, pokrene aktivnosti na:

1. Uređenju prostora u ulici Kralja Stjepana Tomaševića kod broja 1, na lokaciji bivše pozicije kontejnera za smeće, gdje se trenutno nalazi autobuska stanica,
2. Postavljanju autobuske nadstrešnice na toj lokaciji,
3. Ugradnji video nadzora, radi sprječavanja stvaranja divlje deponije i povećanja sigurnosti građana.

Obrazloženje:

Na pomenutoj lokaciji ranije su se nalazili kontejneri za smeće koji su uklonjeni, ali prostor nije adekvatno uređen. U međuvremenu je ta površina postala divlja deponija, što ugrožava:

neometano kretanje autobusa i drugih vozila,

sigurnost pješaka, naročito djece i starijih,

komunalni red i higijenu,

normalan život i svakodnevnicu stanara ove ulice.

Uzimajući u obzir da se radi o aktivnoj autobuskoj stanici, apelujem da se prostor:

funkcionalno uredi kao uređena autobuska stanica s nadstrešnicom,

postavi video nadzor radi prevencije nelegalnog odlaganja otpada,

trajno riješi problem komunalnog nereda.

-vijećnica Nejra Džanko Zukobašić –

1.Podnosim vijećničko pitanje prema Direkciji za puteve Kantona Sarajevo:

Molim Vas da se pismenim putem izjasnite u čiju nadležnost spada ulica Adema Buće, naselje Buča Potok, Općina Novi Grad Sarajevo?

2. Podnosim inicijativu prema Službi za investicije Općine Novi Grad Sarajevo da razmatra potrebu a pri tome i pristupi izradi projektne dokumentacije za pronalaženje alternativnog puta u ulici Hasiba Brankovića, a ukoliko to budžetska sredstva za ovu godinu dozvoljavaju.

-vijećnica Emina Juzbašić -

1.Podnosim inicijativu za postavljanje prinudnih usporivača brzine u ulicama Aerodromskog naselja i to u ulicama:

Akifa Šeremeta broj 13. kod dječijeg igrališta i oko 20 metara prije hotela Octagon;

Rudolfa Rude Tomića kod Konzuma i novog dječijeg igrališta;

Andreja Andrejevića na pravcu kod el. Trafostanice;

Šefika Dorića na pravcu gdje se nalazi dječije igralište i stajalište crvenog taxija.

Također podnosim inicijativu za postavljanje prinudnog usporivača brzine kod OŠ „ Osman Nuri Hadžić“ Dobrinja. Nedavno je tu auto udarilo dijete iz iste škole, ali i prije toga je bilo nesreća.

2. Podnosim inicijativu da se saniraju rupe koje su nastale na mostu ka Dobroševićima, tačnije ulica Bojnička (Stočna pijaca).

Građani se žale da na osnovu tih rupa koje su nastale uz metalne sastave na mostu, dolazi do oštećenja na vozilima. Svakodnevno se koristi pomenuti put i vrlo je bitno da bude siguran obzirom da je u pitanju most ispod kojeg je rijeka.

Negdje tu je prema internet informacijama granica Općine Novi Grad i Općine Ilidža. Molim Vas na odgovor da li je u nadležnosti i da li je moguća sanacija.

-vijećnica Hana Keč-

1. Upućujem inicijativu za postavljanje usporivača brzine u ulici Bajrama Zenunija.

O B R A Z L O Ž E N J E

U cilju povećana sigurnosti učesika u saobraćaju, savijet mjesne zajednice Alipašino Polje A1 ponovo pokreće inicijativu da se u ulici Bajrama Zenunija kod kafica Bella Storia postavi usporivač brzine tj ležeći policajac. Postavljanjem usporivača brzine osigurala bi sr bezbjednost učesnika u saobraćaju, a naročito pješaka.

2. Upućujem inicijativu Općinskoj Službi za boračka pitanja, rad, socijalna pitanja i zdravstvo, da izvrši Mapiranjem prava i potreba samohranih roditelja na području Općine Novi Grad Sarajevo.

O B R A Z L O Ž E N J E:

Kategorija samohranih roditelja je jedna od potpuno zanemarenih i marginalizovanih grupa našeg društva. Mapiranjem prava i potreba samohranih roditelja utvrdila bi se baza podataka jednoroditeljskih porodica na podrčju naše općine i utvrdilo stanje u kojem se nalaze, te njihove potrebe. Na osnovu ovakvog istraživanja utvrdili bi se modeli i mogućnosti da opština pomogne ovoj kategoriji stanovnika bilo u vidu sufinansiranja vrtića i produženih boravaka ili omogućavanja djeci iz ovakvih porodica učestvovanje na besplatnim radionicama i sportskeim aktivnostima koje se nude u Općini, za koje djeca iskažu intersovanje na način da se roditelji prijave Općini.

3. Ispred Savjeta mjesne zajednice Alipašino Polje A1 upućujem inicijativu postavljanje saobraćajnog znaka zabrana parkiranja iza zgrade u ulici Bajrama Zenunija.

O B R A Z L O Ž E N J E

Nesavjesni i neodgovorni vozači često koriste nepostojanje sabračajnog znaka na lokaciji iza zgrade u ulici Bajrama Zenunija te parkiraju automobile na požarni put. Da bi se u svakom trenutku osigurala prohodnost požarnog puta savijet mjesne zajednice Alipašino polje A1 traži postavljanje znaka zabrane parkiranja.

4. Ispred Savjeta mjesne zajednice A1 upućujem pitanje: Informacija o broju zakupljenih parking mjesta na području MZ Alipašino Polje A1 i A2 od strane pravnih lica.

O B R A Z L O Ž E N J E

Kako stanovnici mjesnih zajednica Alipašino polje A1 i A2 imaju izražen problem sa saobraćajem u mirovanju traže informaciju o broju zakupljenih parking mjesta od strane pravnih lica na javnim parkinzima koji se nalaze na teritoriji ovim mjesnih zajednica.

-vijećnika Haris Alihodžić -

1. Pokrećem inicijativu za postavljanje saobraćajnih radara na dvije lokacije na području naselja Dobrinja:

- G transversala
- A transversala

Obrazloženje:

Na navedenim lokacijama evidentna je velika frekvencija saobraćaja, naročito u jutarnjim i poslijepodnevnim satima. Poseban problem predstavlja naglo ubrzavanje vozača prilikom prolaska kroz raskrsnice kada je uključeno zeleno svjetlo na semaforu, kako bi „uhvatili“ i naredno zeleno svjetlo. Ovakvo ponašanje značajno povećava rizik od saobraćajnih nezgoda.

S obzirom na to da se obje transversale nalaze u gusto naseljenom području, u kojem se kreće veliki broj pješaka – uključujući djecu, starije osobe i druge ranjive kategorije – neophodno je dodatno pojačati mjere kontrole brzine kako bi se unaprijedila bezbjednost svih učesnika u saobraćaju.

Stoga predlažem da nadležna općinska služba, u saradnji sa Ministarstvom saobraćaja i policijskim organima, ispita mogućnost postavljanja radara za kontrolu brzine na navedenim lokacijama.

2. Inicijativa: U ime stanara zgrada u ulici Gandijeva broj 11 i 12, podnosim inicijativu prema nadležnim općinskim službama da se planira i realizuje sufinansiranje radova na sanaciji krova na navedenim objektima.

Obrazloženje:

Krovovi na objektima Gandijeva 11 i 12 nalaze se u lošem i dotrajalom stanju, što predstavlja svakodnevni rizik za stanare i imovinu, posebno u periodima obilnih padavina i snijega. Stanari su iskazali spremnost da učestvuju u finansiranju sanacije, te ovom inicijativom traže podršku Općine u vidu sufinansiranja radova.

Uz inicijativu se prilažu potpisi stanara i obrazloženje njihove molbe. Također, predlaže se da nadležna komisija izađe na teren radi utvrđivanja stvarnog stanja i potrebe za intervencijom, u saradnji sa upraviteljem zgrade, kako bi se definisali prioriteti i uslovi sufinansiranja.

-vijećnica Selma Pršeš -

1. Upućujem inicijativu za hitnu sanaciju dijela ulice Deriviša Sude Vražalici 33 na kojoj je, uslijed obilnih padavina, došlo do ozbiljnog odrona i pucanja ceste. Odron je prouzrokovao oštećenje puta i ugrozio sigurnost pješaka i vozača. Kretanje ovom dionicom je otežano i predstavlja rizik za sve učesnike u saobraćaju. Također, postoji opasnost od daljih odrona, što bi moglo pogoršati stanje i izazvati veću materijalnu štetu.

Molim vas da ovu inicijativu razmotrite prioritarno, u najkraćem mogućem roku, kako bi se osigurala sigurnost građana i nesmetano odvijanje saobraćaja.

2. Inicijativa za postavljanje javnih (hajr) česmi na šetnicama u Općini Novi Grad Sarajevo

Obraćam vam se s prijedlogom za postavljanje hajr česmi na frekventnim šetnicama u Općini Novi Grad Sarajevo.

Šetnice su sve popularnije među građanima svih generacija, bilo za rekreativne šetnje, trčanje, vožnju bicikla ili vožnju romobila. Na šetnicama od Otoke do Nedžarića (cca 2,4 km), te od Nedžarića do Dobrinje (cca 1,6 km) nema ni jedan javno dostupan izvor pitke vode. Postavljanje javnih česmi bi u velikoj mjeri doprinijelo ugodnijem i zdravijem boravku na otvorenom, posebno u toplijim mjesecima. Predlažem da se česme postave na najprometnijim mjestima, uz odabir dizajna koji će biti estetski usklađen s ambijentom i izdržljiv na vremenske uvjete.

Također predlažem da Općina omogući zainteresovanim građanima, porodicama i udruženjima da, u formi hajr-donacije, učestvuju u finansiranju postavljanja česmi, uz mogućnost postavljanja prigodnih natpisa u skladu s tradicijom.

Nadam se da ćete ovu inicijativu prepoznati kao značajan doprinos kvaliteti života u našem naselju i pokrenuti potrebne korake za njenu realizaciju.

3. Inicijativa za hitnu sanaciju kanalizacione mreže u ulici 8. mart

Obraćam vam se za hitnu intervenciju i sanaciju ulaska u ulicu 8. mart.

Prilikom obilnijih padavina dolazi do izljevanja kanalizacije, što stvara ozbiljan problem. Na tom dijelu ulice formira se jezero koje onemogućava normalan protok saobraćaja i pješaka. Posebno naglašavam da se radi o putu koji vodi ka školi, što dodatno pojačava hitnost rješavanja ovog problema.

Uvjerena sam da ćete prepoznati ozbiljnost problema i reagovati u interesu svih stanovnika, posebno najmlađih.

4. Inicijativa za otvaranje Policijske stanice u naselju Reljevo.

Trenutno Reljevo raspolaže samo jednim policijskim odjeljenjem koje ima na raspolaganju jednu patrolu. Zbog sve češćih prijava građana koje se odnose na spor dolazak policije, nedostatak patrola i osjećaja nesigurnosti, smatram da je krajnje vrijeme za pokretanje zakonskih radnji na osnivanju Policijske stanice Reljevo u Reljevu sa dovoljnim brojem službenika i patrolnih vozila.

-vijećnica Edita Šandal-

1. Podnosim vijećničku inicijativu za kupovinu zemljišta za izgradnju sporskog i dječjeg igrališta u ulici Brezanska.

2. Podnosim vijećničko pitanje prema ministarstvu za boračka pitanja KS zašto je ove godine prilikom podnošenja zahtjeva za ostvarivanje dopunskih prava porodica šehida i poginulih boraca, ratnih vojnih invalida i demobiliziranih branilaca u Kantonu Sarajevo, po prvi put uvedeno pravilo da oni koji su u protekle dvije godine ostvarili pravo na korištenje banjškog

liječenja, isti tekuće godine neće moći koristiti navedeno pravo?

Koliko je budžetskih sredstava izdvojeno za banjško liječenje, kao i šta će biti sa preostalim iznosom sredstava koji će ostati neutrošeni jer veliki broj demobilisanih boraca i RVI neće imati priliku na medicinsku rehabilitaciju s obzirom na to da su to pravo koristili u prethodne dvije godine? Zašto komisija koja je formirana prošle godine ne vrši selekciju na osnovu zdravstvenog stanja aplikantata na banjško liječenje i toga ko ima opravdane razloge umjesto da se gleda po tome koliko je ko puta išao ba banjško liječenje?

3. Podnosim inicijativu sanaciju stepenica koje se nalaze uz parking kod "Toplana", u ulici Semira Frašte preko puta brojeva 7, 8 i 9, jer su iste vrlo strme i opasne, pogotovo u zimskom periodu, za starije osobe, invalidna lica i djecu.

-vijećnik Bojan Vučković-

1. Produženi boravak u OŠ Osman Nakaš za učenika trećih razreda u školskoj godini 2025/26

Obrazloženje:

U OŠ Osman Nakaš je roditeljima čija djeca koriste usluge produženog boravka da od slijedeće školske godine za učenike trećih razreda više neće biti moguće da koriste ovu uslugu. U obrazloženju se navodi da će se na dijelu produženog boravka praviti menza te da zbog smanjenja kapaciteta neće više biti mjesta za učenike trećih razreda. Prije saopštenja ove odluke roditelje nije niko o tome konsultovao. Također prilikom upisa u prvi razred većina roditelja je i izabrala ovu školu za pohađanje svoje djece jer je ta škola nudila produženi boravak do četvrtog razreda. U protivnom, da nije tako, svi bi svoju djecu upisali u neku drugu školu. Djeca trećih razreda, po nekadašnjem sistemu, su djeca drugih razreda te kao takva premala da sama idu i vraćaju se iz škole te sama borave u stanovima do dolaska roditelja sa posla.

Stoga upućujem inicijativu prema nadležnoj službi da se obrati nadležnom kantonalnom ministarstvu da se ova odluka preispita i stavi van snage ili da se u sklopu škole pronađe neko drugo rješenje kako bi u slijedećoj školskoj godini djeca trećih razreda imala produženi boravak.

2. Otvorenje centra za zdravo starenje na lokalitetima naselja Otoka, Staro Hrasno i Čengić Vila

Obrazloženje:

Ova moja inicijativa se naslanja na Inicijativu po istom pitanju podnesenu na 3. sjednici OV održanoj 13.02.2025. godine u kojoj sam tražio izgradnju ovakvog jednog centra. Inicijativu je nadležna služba odbila jer kako navode, citiram: „Budžetom Općine Novi Grad Sarajevo nisu planirana finansijska sredstva za izgradnju objekta naprijed navedene namjene. Da bi se realizovala Vaša inicijativa neophodno je obezbijediti lokaciju za izgradnju te vrste sadržaja, investiciono tehničku dokumentaciju, pribaviti odobrenje za građenje, te planirati potrebna finansijska sredstva u Budžetu Općine Novi Grad Sarajevo za realizaciju istog.“

Obzirom da je pred nama lista slobodnih poslovnih prostora modifikujem ovu inicijativu u „Otvorenje centra za zdravo starenje na lokalitetima naselja Otoka, Staro Hrasno i Čengić Vila“ te predlažem da se nadležna služba obaveže od Opštinskog vijeća da među slobodnim prostorima pronađe prostor koji je adekvatan i odgovara standardima potrebnim za Centar za zdravo starenje.

Tražim u skladu sa poslovníkom da se Opštinsko vijeće izjasni po osnovu ovog zaključka.

3. Popravka uspornika i viseće svjetleće signalizacije ispred OŠ Osman Nakaš

Obrazloženje:

Prije 1-2 mjeseca je ispred OŠ Osman Nakaš izvršena postavka uspornika/“ležećih policajaca“ u ulici Gradačacka ispred ulaza u osnovnu školu u oba smjera koji bi trebali da nesavjesne vozače automobila odvrate od neprilagođene vožnje i ugrožavanja života naših osnovaca i njihovih roditelja koji ih vode u školu i dolaze po njih po završetku nastave. O (ne)kvaliteti izvršenog posla govori činjenica da su nedugo nakon postavke ti isti uspornici već popucali, otpali su dijelovi istih tako da oni više ne služe svojoj svrsi jer ih vozači sada bez smanjenja brzine mogu lako zaobići. Stoga molim da se što prije pozove izvođač radova te izvrši popravak gore iznesenih oštećenja.

Također se na ovom lokalitetu nalazi i viseći svijetleći znak koji upozorava vozače na kretanje djece, ali koji nažalost nije u funkciji već odavno, očigledno bez posebne želje da se izvrši popravak istog.

-vijećnik Mirza Memišević-

1. Pokrećem inicijativu za hitnu rekonstrukciju ulice Ive Andrića.

Ulica je u izrazito lošem stanju, sa brojnim oštećenjima kolovoza što ugrožava sigurnost saobraćaja. Predlažem da se izvrši kompletna rekonstrukcija..

2. Pokrećem inicijativu za trajno rješavanje problema plavljenja podvožnjaka u Buča Potoku.

Podvožnjak redovno plavi nakon svake obilnije kiše, što izaziva obustavu saobraćaja i materijalne štete. Predlažem rekonstrukciju odvodnog sistema i ugradnju adekvatne automatske pumpe za ispumpavanje vode.

3. Pokrećem inicijativu za izradu cestovne signalizacije i postavljanje usporivača brzine u ulici Adema Buće.

Na lokaciji kod prodavnice SITO i bivšeg restorana Eki, zbog učestalih nesreća, predlažem postavljanje vibracionih traka, ležećih policajaca i adekvatne signalizacije radi povećanja sigurnosti.

4. Pokrećem inicijativu za proširenje parking kapaciteta u C fazi Alipašinog Polja, u ulici Geteova 12–15.

Zbog nedostatka parking prostora i parkiranja na trotoarima i zelenim površinama, predlažem proširenje postojećeg parkinga za potrebe stanovnika ovog dijela naselja.

5. Pokrećem inicijativu prema Skupštini, Nadzornom odboru i upravi JP Lokom da razmotre promjenu sistema naplate parkinga u garaži na Alipašinom Polju.

Predlažem prelazak sa fiksne mjesečne naplate na naplatu po satu, čime bi se povećala fluktuacija vozila, bolje iskoristila parking mjesta i ostvarili dodatni prihodi za ulaganje u nove parking kapacitete.

6. Pokrećem inicijativu za popunjavanje žive ograde ispred ulaza Geteova 12.

Radi očuvanja izgleda naselja predlažem hitno popunjavanje oštećene žive ograde ispred ulaza u zgradu.

7. Pokrećem inicijativu za unapređenje sportske infrastrukture u dvorani Ramiz Salčin.

Predlažem postavljanje LED rasvjete i nabavku zidnih pokretnih koševa, kako bi se poboljšali uslovi za treninge i sportske aktivnosti djece i omladine. Postojeći pokretni koševi zbog svoje težine oštećuju parket.

8. Ko je nadležan za održavanje i sprječavanje plavljenja podvožnjaka u Buča Potoku?

Tražim da se precizira koja institucija je odgovorna za održavanje odvodnje i rješavanje problema plavljenja, te koje su mjere preduzete ili planirane.

9. Kada je kalendarom predviđeno održavanje i uređenje zelene površine ispred ulaza Geteova 12?

Tražim informaciju o planiranom terminu održavanja ove zelene površine i aktivnostima popunjavanja žive ograde.

10. Zašto Drugostepena stručna komisija nije postupila po presudi Kantonalnog suda broj 09 0 U 040899 22 U u tužbi Mustafe Salčina protiv Drugostepene stručne komisije od 04.03.2025. godine?

Tražim da se dostavi objašnjenje o razlozima za nepostupanje po pravosnažnoj presudi i da se navede kada će biti sazvana sjednica komisije u skladu sa presudom.

Molim da mi se u odgovoru dostavi:

1. Informacija da li je komisija sazivana i ako jeste - kada
2. Ako nije sazivana - iz kojeg razloga,
3. Kada je planirano postupanje po presudi Suda,
4. Ko snosi odgovornost za nepostupanje po sudskoj odluci u razumnom roku.

-vijećnik Jasmin Smječanin-

1. Postavljam vijećničko pitanje da mi se dostavi informacija u vezi sa statusom balona na Otoci, u sklopu stadiona FK Olimpik. Koja je cijena zakupnine i do kada traje ugovor o zakupu.

2. Pokrećem inicijativu za sanaciju školskog igrališta u sklopu Osnovne škole Meša Selimović na Alipašinom polju.

3. Inicijativa za postavljanje dvije klupe na autobuskoj kretaljci u ulici Smaila Šikala. Također inicijativa prema Ministarstvu saobraćaja da se na istom lokalitetu postavi natkreiveno stajalište.

4. U kojoj fazi i kad počinje prvi dio sanacije i rekonstrukcije ulice Smaila Šikala.

5. Inicijativa za postavljanje dva ogledala, jedan na ulazu u dvoranu OŠ "Umihana Čuvidina", a jedno ogledalo na spoju ulice Safeta Zajke i Enese Herića.

-vijećnica Selma Alić-

1. Podnosim inicijativu za izgradnju javne rasvjete u ulici Asima Behmena od broja 45 do broja 57 gdje ima samo jedan stub rasvjete. Također je potrebno poboljšati rasvjetu u dijelu naselja Nedžarići u ulicama Ramiza Salčina naročito ulice koje vode prema osnovnoj školi, u ulici Branislava Nušića, Desna strana ulice Aleja Bosne Srebrene koja pripada našoj Općini, Fra Antuna Kneževića, Karla Mijića.

Obrazloženje

Navedene ulice su jako mračne na većini dijelova naročito u zimskom periodu, što predstavlja opasnost za sigurno kretanje građana.

2. U kojoj je fazi izrada projekta uklanjanja postojeće građevine u ulici Smaila Šikala br. 54 i u kojoj je fazi izrada investiciono-tehničke dokumentacije za izgradnju budućeg objekta za koji je predviđeno da se sastoji od poslovnog prostora, centra za zdravo starenje, caffè restorana i centra za mlade. Napominjem da je trenutni napušteni objekat veoma zapušten i potencijalni izvor zaraze zbog povećanog prisustva glodara.

3. Podnosim inicijativu za stavljanje u funkciju protivpožarnog puta u sklopu Doma zdravlja Novi Grad, a radilo se na realizaciji istog još 2017. godine kada je bila treća faza rekonstrukcije Doma zdravlja u kojoj je učestvovala i Općina Novi Grad. Problem parkinga doma zdravlja traje duži period i postoje obećanja Općine za rješenje problema koja još uvijek nisu ispunjena.

Obrazloženje

Rješavanjem dijela puta koji je izvan upotrebe iza Doma zdravlja, a što predstavlja dio protivpožarnog puta riješio bi se problem parkinga za sanitetska i službena vozila. Vjerujem da je nadležnima i uvaženom načelniku Općine podjednako važno rješenje problema vezanog za javno zdravstveni sektor i nadam se brzom rješenju navedenog problema kako se i za kratko vrijeme pristupilo rješavanju priključenja sa parkinga AsA Bolnice na glavnu saobraćajnicu, gdje se radovi već izvode bez odlaganja, a problem parkinga i protivpožarnog puta Doma zdravlja nije riješen adekvatno već duži period.

4. Podnosim inicijativu da se na parkingu Osnovne škole Anex parking mjesta označe kao rezervisana, jer uposlenici škole nemaju mogućnost parkiranja vozila na parkingu škole, zatim da se postavi znak zabrane parkiranja i da se ponovo obilježe već postavljeni usporivač saobraćaja jer im je boja izbljedita.

Obrazloženje

Parking uz Osnovnu školu svakodnevno je uzrumpiran vozilima čiji vlasnici nisu uposlenici škole, pa se nerjetko dešava da su auta parkirana i na pješačku stazu i dio trotoara što predstavlja problem za učenike zbog neadekvatnog prilaza školi i roditeljima koji dovode djecu.

-vijećnica Armela Humić -

1. Pokrećem inicijativu za izgradnju rampe za osobe sa invaliditetom na stepenicama u ulici Prijedorska do broja 11, iza Amko komerca

Cilj ove inicijative je omogućiti lakši i sigurniji pristup građanima koji imaju poteškoće u kretanju s obzirom da na ovom području nemaju olaksice prilikom obavljanja svakodnevnih aktivnosti.

2. Inicijativa za sanaciju trotoara u ulici Safeta Hadžića

Vec duzi vremenski period lose stanje na trotoaru u navedenoj ulici ugrozava sigurnost gradjana i otezava kretanje kod djece, starijih i kod osoba sa invaliditetom i samim tim je sanacija prije potrebna. Sve navedeno je posebno vidljivo u zimskom periodu padanja snijega i kise te je sto prije potrebno zastiti gradjanje da ne bi dolazilo do nezelenih posljedica.

-vijećnik Damir Filipović-

1. Inicijativa za postavljanje interaktivnih turističkih panela na području Općine Novi Grad Sarajevo

Općina Novi Grad Sarajevo ima značajan turistički i kulturni potencijal koji nije dovoljno vidljiv ni iskorišten. Postavljanjem interaktivnih turističkih panela omogućilo bi se savremeno, jednostavno i atraktivno informisanje građana i posjetilaca o znamenitostima, događajima i servisima dostupnim na području Općine. Paneli bi, putem dodirnih ekrana i QR kodova, nudili osnovne informacije, multimedijalne sadržaje i upute za lakše snalaženje, čime bi se unaprijedila turistička ponuda, promovisala kulturno-historijska baština te dodatno podstakao razvoj lokalne ekonomije i turizma.

Predlažem da se u početnoj fazi paneli postave na sljedećim lokacijama: Brdo Žuč-Krila Slobode, Trg djece Sarajeva (Alipašino Polje), Park "Safet Zajko", Tunel spasa - Dobrinja, Sportsko-rekreacioni centar Dobrinja, Centar za edukaciju, sport i rekreaciju Mojmilu i dr.

Ovaj projekt predstavlja investiciju u modernizaciju javnog prostora i dugoročno jača imidž Novog Grada kao dinamične i otvorene zajednice.

2. Postavljanje pametnih punktova sigurnosti i pomoći (SMART SOS KIOSK) na području Općine Novi Grad Sarajevo

Obrazloženje:

S obzirom na veličinu i broj stanovnika, te frekventnost javnih prostora u Općini Novi Grad Sarajevo, postoji potreba za unapređenjem sigurnosne infrastrukture i brzom dostupnošću pomoći u hitnim situacijama. Postavljanjem pametnih punktova sigurnosti i pomoći omogućilo bi se građanima i posjetiocima da brzo i jednostavno pozovu hitne službe, dobiju osnovne informacije o sigurnosnim

procedurama, koriste prvu pomoć ili prijave incidente. SMART SOS KIOSK uređaji bi bili opremljeni kamerama za video nadzor, SOS dugmetom za hitne pozive, informacijama o lokaciji, defibrilatorom i osnovnim sredstvima prve pomoći, uz povezivanje sa službama zaštite i spašavanja.

Predlažem da se u početnoj fazi punktovi postave na sljedećim lokacijama: Park "Safet Zajko", Sportsko-rekreacioni centar Dobrinja, Centar za edukaciju, sport i rekreaciju Mojmiilo.

Ovim projektom Općina Novi Grad Sarajevo bi napravila značajan iskorak u oblasti javne sigurnosti i zaštite građana, dodatno unaprijedila kvalitet života te pokazala odgovornost i brigu za sigurnost zajednice.

3. Realizacija projekta "Sjenke Sarajeva" – interaktivna mapa urbane memorije rata sa QR kodovima Obrazloženje:

Ratna historija Sarajeva ostavila je dubok trag u urbanom prostoru, ali mnoga mjesta stradanja i herojske borbe ostaju nedovoljno obilježena i zaboravljena u kolektivnom sjećanju. Projekat "Sjenke Sarajeva" podrazumijeva kreiranje interaktivne mape urbane memorije rata, kojom bi se putem fizičkih oznaka sa QR kodovima obilježile značajne lokacije na području Općine Novi Grad Sarajevo. Skeniranjem kodova posjetioci bi mogli pristupiti multimedijalnim sadržajima, pričama svjedoka, historijskim podacima i fotografijama, čime bi se na savremen i dostupan način čuvala ratna memorija i jačala svijest o važnosti očuvanja istine.

Realizacijom ovog projekta Općina Novi Grad Sarajevo bi dala snažan doprinos očuvanju kolektivne memorije, edukaciji mladih generacija i promociji kulture sjećanja na lokalnom i međunarodnom nivou.

4. Izgradnja "Parka minijatura" sa najvažnijim kulturno-historijskim objektima Bosne i Hercegovine Obrazloženje:

Bosna i Hercegovina posjeduje izuzetno bogatu kulturno-historijsku baštinu, no ta vrijedna naslijeđa često su raspršena i nedovoljno pristupačna široj javnosti i posjetiocima. Izgradnjom "Parka minijatura" stvorio bi se jedinstven otvoreni prostor u kojem bi na jednom mjestu bile predstavljene minijature najvažnijih kulturno-historijskih objekata iz svih krajeva Bosne i Hercegovine. Svaka minijatura bila bi izrađena u preciznom omjeru, uz prateće info-ploče.

Predlažem da projekt obuhvati objekte poput: Stari most u Mostaru, Gazi Husrev-begovu džamiju u Sarajevu, Mehmed-pašinu ćupriju u Višegradu, tvrđavu Ostrožac kod Bihaća, Franjevački samostan na Šćitu, Baščaršiju, Vijećnicu, Bobovac, manastir Tvrdoš kod Trebinja i druge nacionalno prepoznatljive spomenike.

Za lokaciju parka predlažem područje koje omogućava prirodnu prostranost poput brda Žuč ili platoa Mojmiilo.

"Park minijatura" imao bi višestruki značaj – služio bi kao edukativna platforma za mlade, turistička atrakcija za domaće i strane posjetioce, te bi dodatno afirmisao Općinu Novi Grad Sarajevo kao lidera u promociji kulturne baštine i razvoja inovativnih sadržaja u javnom prostoru, te bi isti istim upravljao JP LOKOM koje bi imalo značajan prihod od istog.

-vijećnica Aida Ožegović-

1. Inicijativa za asfaltiranje dvije staze od ulice Emila Zole prema parkinzima u ulici Nuriye Pozderca i ulici Avde Čuka

Obrazloženje:

Podnosim inicijativu za asfaltiranje dvije staze od ulice Emila Zole prema parkinzima u ulici Nuriye Pozderca i ulici Avde Čuka koja bi skratila put do parkinga invalidnim osobama koji žive u ulici Emila Zole a koji moraju obići ogroman put kako bi došli do svog automobila.

Molim vas da razmotite ovu inicijativu i pozitivno je riješite zbog naših sugrađana.

2. Inicijativa za sanaciju podloge za kontejnere u ulici Emila Zole

Obrazloženje:

Podnosim inicijativu za sanaciju podloga za kontejnere u ulici Emila Zole. U navedenoj ulici već postoji mjesto za kontejnere koje je izbetonirano prije nekoliko desetina godina pa vas molim da navedena mjesta ponovo budu izbetonirana ili asfaltirana jer su jako oštećena.

3. Inicijativa za asfaltiranje dvije staze od ulice Emila Zole prema parkinzima u ulici Nurije Pozderca i ulici Avde Čuka

Obrazloženje: Podnosim inicijativu za asfaltiranje dvije staze od ulice Emila Zole prema parkinzima u ulici Nurije Pozderca i ulici Avde Čuka koja bi skratila put do parkinga invalidnim osobama koji žive u ulici Emila Zole a koji moraju obići ogroman put kako bi došli do svog automobila.

Molim vas da razmotite ovu inicijativu i pozitivno je riješite zbog naših sugrađana.

-vijećnik Enes Husejnović-

1. Pokrećem inicijativu da izvršite rekonstrukciju, zapravo izgradnju, dijela pješkog trotoara u ulici Adema Buće kod broja 193.

OBRASLOŽENJE:

Tokom 2013. i 2014. godine Ministarstvo saobraćaja Kantona Sarajevo (Direkcija za puteve) i Općina Novi Grad Sarajevo, na zadaovoljstvo građana i svih drugih korisnika saobraćajnice, izvršili su rekonstrukciju ulice Adema Buće uključujući rekonstrukciju kolovoza i pješačkih trotoara.

Međutim, na veoma frekventnom dijelu ulice kod broja 193, izgradnja pješačkog trotoara je prekinuta u dužini od 10 metara i nikada nije završena. Napominjem da je prilikom rekonstrukcije ulice, do tada, postojeći trotoar uklonjen, a novi nije izgrađen. Usled atmosferskih uticaja na tom dijelu nasatala je rupa dubine 0,5 metara dužinom neizgrađenog trotoara što predstavlja vrlo ozbiljnu prijetnju sigurnosti pješaka.

Posebno je zabrinjavajuće to što ovu ulicu svakodnevno koristi veliki broj učenika (njih oko 500) Osnovne škole „Avdo Smailović“ koji su prisiljeni izlaziti na kolovoz kako bi zaobišli ovaj dio trotoara, čime im je ugrožena sigurnost i njihovi životi.

Također, voda koja se zadržava u ovom udubljenju sasvim sigurno prodire u trup saobraćajnice i ugrožava njenu konstrukciju i uzrokuje njenu postepenu devastaciju.

Savjet MZ Dolac je upućivao zahtjeve za rješavanje ovog problema prema nadležnim institucijama, međutim do danas nije bilo odgovora na iste.

Zbog svega gore navedenog zahtjevamo hitnu sanaciju, odnosno izgradnju ovog dijela trotoara, kako bi zaštitili sigurnost svih učesnika u saobraćaju, naših građana, a posebno djece.

SEKRETAR
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a